

DISSERTATIO THEOLOGICA
DE
AUREOLIS
VIRGINUM,
DOCTORUM
ET
MARTYRUM,

QUAM,
PRÆSIDE
CHRISTOPH. MATTHÆO
PFAFFIO,

S. THEOL. DOCTORE ET PROF. PRIMARIO,
ACADEMIÆ TUBING. CANCELLARIO, ECCLESIAE
PRÆPOSITO, ABBATE LAUREACENSI,

IN AULA THEOLOGORUM NOVA
AD DIEM XIX. SEPT. A. MDCCCLIII.

DEFENDET
ELIAS KUTTER,

Ravenspurgensis,
S. LITERARUM CULTOR.

TUBINGÆ,
LITERIS LÖFFLERIANIS.

58700(7)





um de diversis gloriæ gradibus quaeritur, sunt, qui in defectu, sunt, qui in excessu peccant. In defectu peccant, qui diversos gloriæ gradus inficiantur. Fertur eorum an-

tesignanus fuisse JOVINIANUS, contra quem HIERONYMUS L. II. disputavit, ita tamen, ut haud exactè & plenè ejus sententiam proposuerit, quod & monet SPANHEMIUS in dub. Ev. P. 3. p. 779. Ex Reformatis PETRUS MARTYR & DANJ. TILLENUS existimavere, ex sacris literis hanc quæstionem decîdi non posse. Aliter JO. CAMERO, qui in præl. ad Matth. XVIII. I. adstruere conatus est, nullos esse glo-

riæ gradus. Vide illius *σωζόμενα* f. 90. sqq. Probabilior
 rem hanc sententiam alterâ putavit SPANHEMIUS l. c.
 dubio 135. Eandem tibiam inflavere SCHÖNFELDIUS,
 Theologus Cassellanus, in diff. de inæqualitate gloriæ
 sanctorum §. 38. & VERDERIUS, Theologus Mont-
 albanensis, quem pec. disput. de quæstione, an in vitâ
 æternâ futuri sint gloriæ gradus, Argentorati A. 1659.
 refutavit DANNHAWERUS. Ex Socinianis VAL. SMAL-
 ZIVS negavit inæqualitatem gloriæ, à SOCINO eapro-
 pter reprehensus in ep. 7. ad eum scriptâ. In excessu
 heic peccant Ecclesiæ Romanæ Doctores, qui putant
 1. inæqualitatem graduum gloriæ pro fundamento habe-
 re inæqualitatem *meritorum* in hâc vitâ comparatorum,
 2. certas quasdam gloriæ prærogativas, quas *aureolas*
 vel & *laureolas* appellant, adscribendas Virginibus,
 Doctores & Martyribus. Aureolas hasce primus in
 systema redegit THOMAS AQUINAS, qui in Supple-
 mento ad tertiam partem summæ suæ qu. 96. prolixè
 suam de aureolis sententiam exponit. Totam verò
 tractationem is in tredecim dividit articulos. In pri-
 mo disquirat, num *aureola* sit aliud à præmio essentiali,
 quod dicitur *aurea*. Scilicet *aurea* est ipsa beatitudo,
aureola verò est aliquid beatitudini superadditum. Pro-
 vocat hîc THOMAS ad Ex. XXV. 25. ubi in Vulgatâ:
super illud facies & alteram coronam aureolam. Con-
 cludit hinc, *aureolam*, cum gaudium quoddam de ope-
 ribus, quæ excellentis cujusdam victoriæ rationem habeant,
 significet, *aureæ* sive præmio essentiali additum, ab *au-
 reâ* sive gaudio, quo quis de conjunctione ad Deum gau-
 det, distingui, nihilominus tamen, quia superaddita sit
 essentiali, esse eo minorem. In secundo articulo dispu-
 tat,

tat, utrum aureola differat à fructu, in tertio, utrum fructus debeatur soli virtuti continentiae, in quarto, utrum convenienter assignentur tres fructus tribus continentiae partibus? Nihil hîc egregii aut notatu digni. In articulo quinto quærit THOMAS, utrum aureola debeatur ratione virginitatis? Affirmat hoc duplici argumento fretus. Primum petitum est ex Jes. LVI. 4. ubi: *hæc dicit Dominus evnuchis dabo eis nomen melius à filiis & filiabus.* Secundum ex Apoc. XIV. 3. 4. unde pateat, solas virgines posse *cannere canticum novum*, utpote, quæ *sequantur agnum, quocunque ierit.* Etenim ait THOMAS, ubi sit præcellens ratio victoriæ, ibi deberi specialem aliquam coronam, eamque excellentiorem. Opponit tamen sibi, ita beatæ Virgini, licet virgo virginum sit, haud deberi aureolam, quia in continendo nullam pugnam sustinuerit, utpote à concupiscentiâ omni pravâ immunis. Responsio, quam dat, est frigida, *quamvis non habuerit pugnam per tentationem à carne, habuisse tamen pugnam per tentationem ab hoste, qui nec ipsum Christum reveritus fuerit, uti pateat ex Matth. IV.* In sexto articulo disputat Doctor Angelicus, utrum Martyribus aureola debeatur? Monet hîc, aureolam esse præmium, quod operibus supererogationum *reddatur.* Id quod & antea jam dixerat, aureolas saltem pertinere ad eos, qui, cùm præcepta servârint, & consilia servant. Addit tamen, eos saltem Martyres opus supererogationis facere, qui Christum confiteantur requisiti. Ita & putat, aureolam mereri &, qui non statim ex plagâ vel vulnere acceptis moriantur, sed supervivant. Imò & inter Martyres aureolâ dignos recensendos

dos esse infantes Bethlehemiticos ab Herode occisos. Licet enim naturaliter usum rationis non habuerint, tamen vel virtute divinâ illum in ipsis fuisse acceleratum, uti in Johanne Baptistâ, dum adhuc in materno utero esset, vel fuisse ipsos Martyres saltem actu, non voluntate, adeoque tamen nactos aureolam, non quidem secundum perfectam rationem, sed tamen secundum aliquam participationem, secundum quam *aliquid martyrii* habuerint ex hoc, quod pro Christo passi fuerint. In articulo septimo disquirat Vir scholasticus, utrum Doctoribus aureola debeatur? Affirmat, Doctores aureolam consequi, propter victoriam, quam obtineant adversus diabolum per prædicationem & doctrinam. Mirum, illum heic non allegare oraculum Danjeliticum XII. 3. quod alii allegant. In articulo octavo quærit, utrum Christo aureola debeatur? Conclusio hæc est: *Quamquam Christo aurea debeatur, cum strenuè pugnaverit & vicerit, non tamen aureola debetur, quod aureola quandam perfectæ victoriæ participationem denotat, quod Christo non convenit, in quo ipsa perfectæ victoriæ plenitudo existit.* Ratio est, quia aureola dicat aliquid minus aureâ, & sit aureæ diminutivum. Licet ergo Christus fuerit verissimè Virgo & Martyr & Doctor, tamen præmium accidentale, quod his respondeat in Christo, non habere aliquam nobilem quantitatem in comparatione ad magnitudinem essentialis præmii, unde Christus non habeat aureolam sub ratione aureolæ. Miraris subtilitatem, lector. Articulus nonus disputat, utrum Angelis aureola debeatur? Negatur hoc, quia in Angelis nec concupiscentia prava, nec pugna est. In articulo decimo disquiri videas,

deas, num aureola etiam debeatur corpori. Negatur & hoc, quia animæ, quæ modò sunt in Paradiso, habent aureolas, nec tamen habent corpora, quia omne meritum, quod parit aureolam, est ab animâ, & aureola propriè est in mente, etsi hæc aureola, succedente deinceps corpore, per quandam redundantiam etiam in corpore refulgeat. Nec tamen, addit THOMAS, decorem cicatricum, quæ in corporibus Martyrum apparebunt, posse dici aureolam, quia aliqui Martyres aureolam habituri sint, in quibus huiusmodi cicatrices non erunt, qui sunt submersi, aut famis inediâ vel squalore carceris interemti. Undecimus articulus hanc quæstionem complectitur: utrum convenienter designentur tres aureolæ, virginum, Martyrum & Prædicatorum? Hic ita procedit Vir subtilis: *Videtur, quòd inconvenienter designentur tres aureolæ, Virginum scilicet, Martyrum & Prædicatorum. Aureola enim Martyrum respondet virtuti fortitudinis eorum, aureola virginum virtuti temperantiæ, aureola verò Doctorum virtuti prudentiæ. Ergo videtur, quod debeat esse quarta aureola, quæ respondeat virtuti iustitiæ. Præterea Ex. 25. dicit glossa, quòd corona aurea additur, cum per Evangelium his, qui mandata custodiunt, vita æterna promittitur Matth. XIX. Si vis ad vitam ingredi, serva mandata. Huic aureola superponitur, cum dicitur: Si vis perfectus esse, vade & vende omnia, quæ habes, & da pauperibus. Ergò paupertati debetur aureola. Præterea per votum obedientiæ aliquis se subicit Deo totaliter. Ergo in voto obedientiæ maxima obedientia consistit. Et ita videtur, quòd ei aureola debeatur. Præterea multa sunt etiam alia supererogationis opera, de quibus homo in futuro*

futuro speciale gaudium habebit. Ergò multæ sunt aliæ aureolæ præter has prædictas. Præterea, sicut aliquis divulgat fidem prædicando & docendo, ita scripta compilando. Ergò & talibus quarta aureola debetur. Conclusio hæc est: Cùm virgines, Martyres & Doctores in perpetuâ pugnâ sint & victoriam ex eâ consequantur, eis convenienter assignatas esse tres aureolas, quod latius deducitur. In articulo duodecimo occurrit quæstio: Utrum aureola virginum sit potissima inter alias? & respondetur, cùm Martyrum pugna fortissima sit, vehementissimeque affligat, aureolam eorum esse omnium potissimam. Denique in articulo decimo tertio quæritur: Utrum alius alio aureolam excellentius habeat? Succedit conclusio: Cùm meritum sit causa præmii, consequens esse, ut, sicut meritum merito sit majus, sic aureola una major alterâ esse dicatur. Habes jam totam mentem THOMÆ, lector, quam catervatim & suam fecere Scholastici, maximè, qui in Thomam commentati sunt. Viam omnibus stravit Glossator ad Ex. XXV. 25. fictâ post Gregor. M. & Bedam allegoriâ. Ast &, qui aliâs in LOMBARDUM commentati sunt, hîc excurrunt, ex quibus SCOTUS in 4. sentent. dist. 49. quæst. 5. art. 2. distinctiones aureolarum has ponit, in capite Martyris coronam cerni rubram, in capite virginis candidam, in capite Doctoris viridem. Idem observat, Martyres fortassis etiam in manibus gestaturos palmas, virgines alba lilia, Doctores virides ramos incorruptibiles. PALUDANUS ad L. IV. sent. dist. 41. addit, fore in corpore quandam decentiam & pulchritudinem singularem repræsentativam aureolæ, Prædicatori in ore, Virginibus in illâ parte, Martyribus in cicatricibus vel aliis partibus corporis

vis secundum genus martyrii. Mirum, quâ Scholastici hîc quæstiones otiosas cumulent. Ita e. gr. quærunt, num Martyri resuscitato, qui rursus martyrium obierit, id quod S. Sebastiano contigisse ferunt, duplex debeatur aureola, & respondent, quòd sic. Ita quærunt, num & Abeli debeatur aureola, & respondent, quòd non, quia, si supervixisset, uxorem duxisset. Ita porrò quærunt, num & mulieribus doctõribus debeatur aureola, & respondent, quòd non, quia mulieres in ecclesia tacere debeant. Mirum, quòd non quærant &, num & Pontifici Romano, Doctõri universali, debeatur aureola? Phalangem Scholasticorum hîc produci videas à CALOVIO in syst. loc. Theol. T. XII. p. 345. sqq. & JO. MEISNERO in astrosophiâ mysticâ por. 3. §. 3. Quàm facile esset, adcitare hîc infinitos alios, quorum unus alterum exscribit, id quod familiare Scholasticis est, ita, ut, uno, lecto, ferè omnes lecti sint. Addimus saltem jam GREGORIUM de VALENTIA Comment. Theol. T. IV. f. 2434. sqq. qui itidem pro aureola Virginum allegat Jes. LVI. 5. pro aureola verò Martyrum Apoc. II. 17. pro aureola Doctõrum Danj. XII. 3. Matth. V. 19. itemque AD. TANNERUM in Theol. Schol. T. II. fol. 151. sqq. CLAUDIUM ESPENCÆUM, qui ad 2. Tim. IV. 7. n. 23. Opp. f. 430. sqq. datâ operâ de aureolis agit, & ad coronam beatitudinis ipsius probandam ad Jes. XXVIII. 5. ad aureolam Martyrum probandam ad 2. Tim. II. 5. IV. 8. Apoc. VII. 9. 14. ad aureolam virginum probandam ad Sap. IV. 2. Apoc. XIV. 4. ad aureolam Doctõrum probandam ad Prov. IV. 9. provocat, testimoniis veterum Eccl. Doctõrum quoque prolixè adductis, RODERICVM de ARRIGA, Jesuitam Hispanum, Theologum & Cancellarium

B

Pragen-

Pragensem in Disput. Theol. T. II. f. 553. sqq. qui verò non saltem putat, totam hanc quæstionem non esse magni momenti, sed & existimat, non saltem virginibus, Martyribus & doctoribus tribuendas aureolas, sed & aliis pluribus, etiam Angelis, etiam Christo &c. atque TANNERVM refutat, ex recentioribus duos Purpuratos, VINCENTIUM MARIAM GOTTI in Theologiâ Scholastico-dogmaticâ, juxta mentem Thomæ Aqu. T. VII. p. 90. sqq. ubi & hic, aureolam propriè quidem esse in mente, sed redundare tamen etiam in corpus, additque: *Quale futurum sit hoc signum in corporibus beatorum, Deus novit. Forte erit fulgor aliquis specialis supra caput beati in modum circuli seu coronæ, ita sanè sanctos & quidem quoscunque, quibus etiam aureola non adscribitur, pingi videas. Et quia quilibet beatus non tantum propriam suam beatitudinem perfectissimè cognoscit, sed etiam beatitudines particulares & proprias omnium aliorum beatorum, ideò videndo ejusmodi coronas luminosas statim cognoscet, an sint aureolæ vel Martyrum, vel Virginum, vel Doctorum.* Alter ex Purpuratis, qui verò nunc Pontificem Ecclesiæ Romanæ sub titulo BENEDICTI XIV. agit, est PROSPER de LAMBERTINIS, qui in vasto opere de servorum Dei beatificatione & beatorum canonizatione L. III. C. 15. ubi §. 4. 5. de aureolis Martyrum maximè agit, atque FRID. SPANHEMIUM reprehendit, quòd in dubiis suis Evangelicis P. III. dub. 89. quæ scripserit, *impiè adversus aureolas effutierit.* Mirum, pervulgatum hoc esse Romæ, Pontificem hunc, de quo mira vulgus spargit, non possidere nisi eruditionem Monachalem. Num Monachi, maximè Itali, aliquid de SPANHEMIO nòrunt? Protestantium

stantium Theologorum incultus ipsis ager est. Ast & mirum, Pontificem nec refutâsse SPANHEMIUM, nec ARRIAGAM, qui THOMÆ contradixere ambo. Tempus est, ut jam nostram sententiam dicamus. Existimamus autem I. certum esse, quòd gradus gloriæ sint inæquales pro ratione graduum sanctitatis hominum hâc in vitâ. Deus enim gloriam dispensat non quidem *propter* meritum, sed *secundum* qualitatem operum Rom. II. 16. Apoc. XXII. 12. Sed hæc gradibus differt. Ergò & præmium. II. Si claritas corporum resuscitatorum differet 1. Cor. XV. 41. 42. differet sanè & gloria. III. Diversa sunt lucra Trapezitarum spiritualium Luc. XIX. 6. sqq. diversi fructus aratorum spiritualium 2. Cor. IX. 6. IV. Quis negârit Apostolorum prærogativas Matth. XIX. 28. 29. V. Quis negârit diversitatem pœnarum infernalium? VI. Ubi inæqualis labor & pugna, ibi inæquale præmium. Poscunt hoc justitiæ regulæ. Addunt, eapropter dici, in domo Patris multas esse mansiones Joh. XIV. 2. & dari in illâ, qui saltem janitores sint Ps. LXXXIV. 11. dari minimos & magnos Matth. V. 19. XI. 11. XVIII. 4. & qui sint primogeniti Hebr. XII. 23. dari, qui fulgeant fulgore diverso Danj. XII. 3. Hinc beatos dici *ισαγγέλως* Luc. XX. 36. Sed Angelorum dari classes majorum & minorum. Addunt porrò Jes. LVI. 5. Cant. VIII. 12. Jam audiatur & altera pars. Videas provocari hîc ad Matth. XIII. 43. ubi de justis in genere, fore, ut *fulgeant ut sol*, fore itaque omnium splendorem æqualem, ad Matth. XX. 9. 10. ubi omnes, non obstante labore majore, acceperint eundem denarium, ad 1. Cor. VI. 2. 3. ubi omnibus sanctis idem promittatur, quod Apostolis Matth. XIX. 28. ad 1. Cor. XV. 28. ubi Deus dicitur futurus *omnia*

in omnibus , ad 2. Tim. IV. 8. ubi eadem corona, quæ destinata fuit Paulo, destinata & legitur beandis omnibus, ad Hebr. XII. 23. ubi omnes beandi dicantur primogeniti, ad Apoc. I. 6. ubi affirmetur, Christum omnes ex æquo fecisse Reges & sacerdotes, ad Apoc. II. 26. ubi omnibus tribuatur potestas in gentes, ad Apoc. III. 21. ubi omnibus promittatur sessio in throno Christi. Accedunt rationes. Beatitudo ut sic parta est merito Christi, quod æqualiter omnes beati possident. Fructus itaque meriti, beatitudo nempe, æqualis quoque est. Porro, si gradus beatitudinis essent inæquales, in beatos hos & illos caderet imperfectio, & appetitus horum & illorum non esset plenè exsatiatus. Ast responderet quoque SPANHEMIUS ad argumenta supra pro inæqualitate beatitudinis allata. Ad Rom. II. 16. non institui hîc comparisonem beatorum inter se vel individuorum unius classis & unius ordinis, sed duarum classium oppositarum, beandorum nimirum & damnandorum, imò individuus unius ordinis unum idemque assignari præmium comm. 10. ad 1. Cor. XV. 41. sermonem ibi esse Apostolo non de gloriâ beatorum in cœlis, nec de gradibus & diversitate illius, sed tantum de differentiâ corporum nostrorum, qualia circumferimus hâc in vitâ, & qualia seminantur, & illorum, quæ excitabuntur, nihilque aliud dici, quàm aliam esse cœlestium gloriam, aliam terrestrium, ad Luc. XIX. 16. sqq. Theologiam symbolicam non esse argumentativam, nihil innui aliud, quàm, qui donis cœlitus datis rectè usi fuerint, amplâ mercede olim donandos, id quod ex loco parallelo Matth. XXV. 20. pateat, ubi idem præmium destinetur

&

& , qui quinque & qui duo talenta lucratus fuerit, ad 2. Cor. IX. 6. supponi gratis, Apostolum loqui de *Θερσισμῶ* vitæ futuræ, duplicem esse *Θερσισμόν*, unum vitæ præsentis, alterum futuræ. Nihil obstare, quò minus hîc intelligatur prior, dona nimirum tùm corporalia, tùm spiritualia, quibus Deus remuneraturus sit beneficentiam exercitam in suos comm. 8. Addit, & hoc gratis supponi, quòd *Θερίζειν Φειδομένως* & *Θερίζειν ἐπ' εὐλογίαις* sit res ejusdem ordinis, etsi non ejusdem gradûs. Jam enim *Θερίζειν Φειδομένως* esse *nihil metere*, & pœnæ indicium, non præmii, uti *σπείρειν Φειδομένως* non sit actus bonus, sed malus, alienus quippe à Dei præcepto, ab officio œconomi, à praxi datorum, quos Deus diligat, qui sint datores *hilares*, adeoque liberales, pro virili, non parci. In vitam denique beatam non cadere messem parcam, abundare gloriâ, abundare beatitudine beatos omnes. Ad Matth. XIX. 28. quòd hîc promittatur Apostolis, promitti singulis fidelibus 1. Cor. VI. 2. 3. uti jam monuimus, & , quando his vita æterna comm. 29. promittatur, hoc esse exegeticum prioris, nihilque diminutivi. Addunt, ex inæqualitate pœnarum infernalium non sequi inæqualitatem gloriæ, peccari hîc elencho parium & *παρὰ τὸ ἐπίμενον*. Aliam esse rationem pœnarum, præmiorum aliam, pœnas debitas esse, præmia non item. Beatitudinis causam unicam esse meritum Christi, quod inæqualiter non dispensetur, non gradus sanctificationis, sed causam damnationis esse peccata, quæ sint variarum specierum, variorum graduum. Patere hinc & , diversitatem pugnæ & laboris diversitatem graduum in gloriâ non ponere. Hoc si esset, habituros beatos,

quòd in operibus suis glorientur contra Ephes. V. 9. Deumque pro absolutâ libertate suâ unam eandemque mercedem largiri licet diversimodè operantibus Matth. XX. 13. 14. 15. Ad Joh. XIV. 2. peccari hîc ignoratio-
 ne elenchi , nec enim quicquam hîc de *imparitate* man-
 sionum cœlestium , sed de *multitudine* saltem illarum ,
 & de amplitudine regni Dei dici , à multitudine verò
 mansionum ad illarum disparitatem non valere conse-
 quentiam. Ad Ps. LXXIV. 11. dici possit , sermonem
 ibi esse de hâc vitâ , de tabernaculo sacro. Korachi-
 tarum hoc officium fuit , stare ad portam templi 1. Chr.
 XXVI. 1. 2. Chr. VIII. 14. Ad Matth. V. 19. XI. 11.
 XVIII. 4. *minimos* hîc significare *nullos* , in regno enim
 cœlorum in regno gloriæ nonnisi *magnos* esse posse ,
 uti egregiè ajat Augustinus L. 1. de sermone Domini
 in monte. Imò intelligi per regnorum cœlorum hîc
 non regnum gloriæ , sed gratiæ , hoc est , Ecclesiam.
 Ad Hebr. XII. 23. dici possit , *primogenitos* esse pri-
 mos conversos ex Judaïsimo & Gentilismo , *justos con-*
summatos esse Patriarchas & fideles V. T. omnibus
 competere eandem gloriam. Ad Danj. XII. 3. lucere in-
 star splendoris cœli esse idem prorsus , ac lucere instar
 stellarum , quæ cœlum illustrant. Ad Luc. XX. 36. bea-
 tos dici futuros *ἰσαγγέλους* , Angelis similes , non simpli-
 citer , sed saltem secundùm quid. Constitui enim pa-
 ritatem illam diserte in eo , quòd in resurrectione ne-
 que uxores ducturi neque nuptum daturi & immorta-
 les sint. Imò sequi ex h. l. potius æqualitatem gloriæ ,
 quia omnes sine distinctione futuri sint *ἰσάγγελοι*. De-
 nique gratis supponi , diversos esse gradus felicitatis
 & gloriæ Angelorum. Esse hoc probare obscurum
 per

per æquè obscurum vel obscurius. Imò , tametsi darentur diversi gradus gloriæ inter Angelos , vacillare tamen consequentiam in ordine ad homines , Angelos quippe diversæ esse speciei secundum Pontificios , non homines. Ad Jes. LVI. 5. reponi videas, evnuchis physicè talibus , qui juxta Deut. XXIII. 1. prohibiti fuerint à congregatione sacrâ , servaturis legem divinam promitti stationem in illâ & nomen melius præ filiis & filiabus , istam non servaturis , nomen melius, quàm , si filios & filias susciperent, adeoque per nomen melius non significari gradum beatitudinis. Denique ad Cant. VIII. 12. ubi : *vineam meam coram me est, mille tui, pacifice , & ducenti his , qui custodiunt fructus ejus* , respondetur , quòd non instituatur hîc collatio censûs reportandi à pastoribus comparatè in ordine ad fideles alios , quibus minor census assignetur , sed comparisonem potiùs proponi censûs , qui redeat ad Dominum vineæ , & censûs , qui redeat ad custodes illius, unde mille ficlorum proventus Salomoni assignetur , ducentorum custodientibus fructum vineæ , ut constet, Salomoni cœlesti præcipuos Ecclesiæ proventus deberi , nec tamen frustra custodes vineæ laboraturos circa custodiam illius , sed & illis præmium aliquod , & magnum quidem ob ministerium vineæ Domini fideliter impensum tùm in hâc vitâ decretum esse , tùm in futurâ , hâc gratiæ & consolationis, ibi gloriæ & gaudii æterni , cujus verò omnes fideles sint compotes. Excussimus oculos dissentientium. Sequitur , ut ad eorum exceptiones respondeamus, ut securi stemus in thesi. Dicimus itaque 1. ex Apoc. XXII. 12. patere satis , *unicuique reddendum secundum opera , quæ patrârit*.

trârit. Cur memorantur opera & eorum diversitas, si in censum non veniunt? 2. 1. Cor. XV. splendor corporum, quæ beati resuscitati gerent, comparatur diversis cum splendoribus, gradu differentibus, solis, lunæ, stellarum, prout apparent. Unus splendor superat alterum, en gradum! Conferuntur itaque inter se non tantum corpora terrestria & cœlestia sed & hæc inter se, & innuitur gloriæ disparitas. 3. Luc. XIX. 16. sqq. differunt utique inter se quinque & decem talenta, prout differunt charismata, queis spirituale facimus lucrum. Quis neget, graduum hîc innui differentiam, uti in charismatis, ita in lucro? Quis neget porro, gaudia cœlestia admittere gradus? 4. 2. Cor. IX. 6. intelligitur utique *ἡ ἀποδομις* vitæ futuræ. Jam & Gal. VI. 8. 9. *ἡ ἀποδομις* parvus non est nullus, qui nec parcus est. 5. Matth. XIX. 28. promittitur sessio in XII. thronis, non pluribus, sed 1. Cor. VI. 2. 3. nîl de thronis exstat. Dantur iudices primarii, dantur secundarii. Manifestum est, distingui eos, qui vitam æternam consequuntur in genere, à sessuris in XII. thronis. 6. Quid? si œconomia divina ferat, ut fructus meriti Christi dispensentur secundum gradus nostræ sanctificationis, secundum opera vel præstantiora vel minùs talia? At verò secundum opera uniuscujusque acturum in remuneratione Deum jam probatum est. Nec tamen sic gloriaturus est salvatus, qui novit, solam esse gratiam, quæ juxta gradus gloriam dispense. 7. Nolim, per denarium Matth. XX. intelligi vitam æternam, quæ non datur murmurantibus. Parabola hæc est, cujus tertium hoc est, omnia gratiæ divinæ eique liberrimæ, quæ tamen & œconomiam suam, li-

cet liberrimam habet, deberi, & genium mercenarium Domino exosum esse. 8. Quærimus, unde multitudo mansionum cœlestium veniat? Ratio à disparitate petenda. Si dixeris, hâc in urbe multas esse domos, quis est, qui per somnium saltem conjecerit, solam innui multitudinem, disparitatem nullam? Reliqua facilè mittimus. Sed & exponenda jam essent, quæ contra argumenta thetica dissentientium dici possint debeantque, nisi plurima in antecedentibus jam præoccupavissimus, e. g. de merito Christi, quod æqualiter dispensetur, de denario, de eâdem judicandi dignitate omnibus fidelibus competente, quæ sit Apostolorum &c. &c. Reliqua omnia, quæ afferuntur, ita comparata sunt, ut gradus gloriæ admittant. Sed, quid de imperfectione eorum dicendum, qui gradu minore beatitudinis fruuntur? Num cadit in gloriam imperfectio? Quid est perfectio? Qualitas est bona, inesse debita. Hæc definitio cadit & in minores gradus. Minor perfectio defectus non est, qui est carentia qualitatis bonæ inesse debitæ. Sufficiant hæc ad dandum novum specimen, tractandi controversias per rationes dubitandi & decidendi juxta morem J. Ctorum in consiliis suis. Pergimus, atque, ut ad argumentum dissertationis hujus nostræ primum revertamur, & II. observamus, sufficere, si statuantur gradus gloriæ inæquales, non opus esse aureolis illis, quæ & ineptè restringuntur saltem ad virgines, Martyres & Doctores, cùm, ut ARRIAGA benè monet, præcipui gloriæ gradus & aliis, qui magnos in sanctificatione passus fecerint, tribuendi veniant, etsi ille quidem præcipuè pro Monachis agat, quorum causam verò nos planè non agimus. Restat itaque, ut examinemus argumenta, quæ ex sacris oraculis depro-

C

munt

munt Aureolistæ pro privilegiis gloriæ privis Virginum, Martyrum, Doctorum. De argumento generali ex Ex. XXV. 25. ita SPANHEMIVS l. c. §. 4. p. 447. *Notatio nominis jocularis est, ut & probatio illius ex Ex. XXV. 25. Deus jubet mensam panum propositionis circumdari tæniâ palmari & insuper זר זהב limbo aureo. Ergo promittit aureolas, h. e. præmia quædam peculiaria ultra beatitudinem Doctoribus, Virginibus, Martyribus. Hæc ratiocinatio acuta est supra Chrysippum. Hoc verò non argumentari est, sed ludere, & in re seriâ quidem & sacrâ. Nota benè, allegorias nil probare, nedum tam coactas. Transeat hoc. Ast, quid pro aureolis primò Virginum, quâ voce, sensu ecclesiastico non saltem designatur sexus sequior, sed denotantur etiam mares, cœlites nempe, dicitur? Primum oraculum, quod allegatur, exstat Jes. LVI. 5. Diximus jam aliquid ad h. l. quod nunc repetere juvat. De Eunuchis physicè talibus, non metaphoricis, sermo hîc est, de iis, quibus introitus in congregationem sacram erat prohibitus. Ecce interpretationem nostram, quam in diff. de causis divortii sub finem dedimus. *Dicitur hîc, Eunuchis, qui sabbata Dei, qui ipsius mandata fœdusque servaverint, in domo Dei & illius muris datum iri spatium & nomen præ filiis & filiabus, nomen æternum, non excindendum. Non disputabimus jam, num de temporibus veteris vel novi Testamenti differat Propheta sanctus? Prius existimat Seb. Schmidius in Collegio Biblico priorè p. 373. sqq. posterius idem in Jesajæ h. l. quæ & communis sententia interpretum est. Si ad V. T. verba Prophetæ applicentur, jam enim de servatione sabbatorum divinatorum & de domo Dei illiusque muris illa agunt, post captivitatem Babylonicam abrogata ista lex, quæ**

quæ evnuchos à congregatione sacrâ prohibet Deut. XXIII. 1. *censeri possit.* De N. T. hûc enim respicere videtur contextus, nullum dubium moveri potest, ubi sine dubio lex illa vetus evanuit. Non, inquam, opus est, hæc ut jam determinemus. Sufficit, in hoc textu non agi de Evnuchis metaphoricis, sed propriè sic dictis, ut jam diximus, nec exstare in textu filiis & filiabus Dei, quod supponit Bellarminus, & promitti præmium non Evnuchismo, sed servationi mandatorum divinatorum, addimus, idque saltem externum, nec in cœlo, sed in Ecclesiâ, quæ hîc domus Dei vocatur. Quod ipsum si ad gloriam extendatur quoque, uti extendi potest, comparatio Evnuchorum piorum fiet cum iis, qui mandata divina non servavere, adeoque regno cœlesti exclusi sunt. Secundus locus, qui pro aureolis Virginum adducitur, exstat Apoc. XIV. 4. ubi nobis sistuntur citharædi novum canentes canticum Apoc. V. 9. quod nemo potuerit discere nisi 144000 illi Apoc. VII. 4. sqq. emti de terrâ 1. Cor. VI. 20. VII. 23. Additur, hos citharædos esse eos, qui cum mulieribus non sint inquinati Apoc. XIV. 8. XVIII. 3. XIX. 2. esse enim eos virgines, qui sequantur agnum, quocunque iverit, esse emtos ex hominibus, primitias Deo & Agno, in quorum ore non sit inventus dolus, esse enim inculpatores coram throno Dei. Non existimârim, significari hîc virgines propriè tales, qui, habetur enim in Græco vox ἄτοι, votum cælibatus voverint, quod contra primam divinam legem Gen. I. 28. vergit. Credisne tu, 144000 illos ex tribubus Israël obsignatos fuisse cælibes omnes, qui votum cælibatûs voverint? Credisne tu, evitationem scortationis vel libidinis adulterinæ vagæ mereri præcipuam aureolam? Credisne tu, solos

cælibes aptos esse canendum novum istud canticum Apoc. V. 9. nullosque alios id canere posse vel ad id canendum esse obstrictos? Credisne tu, solos cælibes esse emtos sanguine Christi? Credisne tu, matrimonium, quod Deus instituit, quod pretiosum, quod honorabile nuncupatur Ebr. XIII. 4. esse statum impurum? Credisne tu, solos cælibes vel cælibatus voto ligatos sequi Agnum, atque inculpato esse? Credisne tu, solos cælibes esse primitias Deo & Agno consecratas, contra Jac. I. 18. Mulieres illæ, cum quibus Virgines hi non sunt inquinati, sunt civitates idololatricæ, quæ sub mulierum forma repræsentantur, uti mulier ista & Babylon mystica Apoc. XVII. Veram esse interpretationem nostram patet ex contextu & commate quidem octavo insequente. Virgines itaque dicuntur, qui idololatriâ non sunt inquinati, sive ethnicâ sive pseŭdo-Christianâ. Hos sub citharædorum figurâ vidit in ecstasi Johannes. Nec Sap. IV. ad quem locum provocat ESPENCÆUS, plus probat, quàm ἀτεχνίαν μετ' ἀρετῆς & pugnam castitatis coronari, ut virtutes alias. At verò, si aureola debetur cælibi, existimasne tu, veteres illos Ecclesiæ Doctores, qui in conjugio vixere, se ipsos aureolâ hâc privare voluisse, vel Clericos illâ privare voluisse, qui Clerogamiam defenderunt, ex quibus eminet Udalricus Episc. Aug. cujus epistolam hanc in rem ad Nicolaum I. scriptam novo cultu eoque critico ornatam denuò dabit M. Jo. JAC. ESSICH, Ecclesiæ Evangelicæ Ravensburgensis Minister doctissimus. Jam ad Martyres. Nullum est dubium, magnam eorum prærogativam in gloriâ esse, quâ coronantur. Quid quæso vincentibus promittitur Apoc. II. III. Sed qui vincunt, soli Martyres non sunt. Ais, amictos esse tamen illos

illos stolis albis Apoc. VI. 11. & gestare palmas in manibus suis Apoc. VII. 9. 13. sqq. Sed unde probas tu, has stolas albas, has palmas esse aureolas tuas, quas fingis? Stolæ albæ spectant ad vincentes omnes Apoc. III. 5. 18. Ast palmæ tamen solis debentur Martyribus, quia victoribus. Ita Virgilius Æneid. L.V. versu III.

Et palmæ pretium victoribus.

Ita Pausanias in Arcad. ἐς δε τὴν δεξιὰν ἔσι καὶ πανταχῇ τῷ νικῶντι ἐπιθέμενος φοίιξ, *in dextram ubique victori dabatur palma*, quod in certaminibus Græcorum, ut erant Pythia, Isthmia &c. familiare erat. Ita & Ambrosius hexam. L. III. C. 13. *Laurus & palma ad insigne victoriæ pertinent. Lauro victorum capita coronantur, palma manûs victricis ornatus est.* Sed nec laurus in capite nec, palma in manu aureola in mente est. Possem hîc varias in quæstiones excurrere, si vellem. Num Martyres sint, qui non requisiti ipsi tyrannis se objecere? num, qui apostasiâ vitam redimere haud potuere? qui, ne tyrannorum sævitix se exponerent, se ipsos necavere? qui peccatorum luto immerfi nondum egere pœnitentiam, licet pro fide occumberent? num & hæretici Martyres esse possint? Num, qui fidem superstitionibus contaminant, & ob illam & has mortem patiuntur? Num embryones matrum Martyrum quoque inter Martyres referendi? Num infantes Bethlehemitici quoque Martyribus accensendi? Num Joh. Baptista? & hâc occasione, num etiam illi Martyribus annumerandi, qui pro veritate saltem dictâ occumbunt? Num Joh. Nepomucenus rectè Martyr dicatur, quia secretum confessionis revelare noluit? quod jure divino inviolabile non est, sed revelandum, si præcaveri ita hoc vel illud malum insigne possit. Num Virgo Deipara inter Martyres referenda? Num Christus ipse, quem Sociniani nudum

putant fuisse Martyrem? Num, qui tristis mortem pro fide obit, cum vitam servare mallet, si sine dispendio salutis æternæ posset? Num milites, qui occumbunt in bello ob religionem gesto, Martyribus annumerari possint? Infinitæ sunt quæstiones, quæ hîc moventur, sed quas tangere instituti præsentis non est. Pedem figimus in Doctõribus. Heic ad Oraculum Danjeliticum diximus provocari. Sed nihil hîc præcipui doctõribus assignatur, uti ex Matth. XIII. 43. 1. Cor. XV. 41. patet. Et Prov. IV. 9. sapientiæ adscribitur corona, non præcise doctõribus. Observamus III. eapropter vel maximè rejiciendas aureolas, quod merito & quidem operum supererogationis, quæ statuuntur, superstruantur. Tune quæso, homuncio, qui totum te Deo debes, qui mancipium Dei es, qui, quicquid es, habes & possides, à merâ Dei gratiâ habes, tantâ inflatus superbiâ es, ut credas, te Deum demereri posse? Latetne te, gratiam omne meritum tollere? Si hoc te latuerit, disce id à Paulo Apostolo Rom. XI. 6. Existimasne tu, meritum Christi hoc tibi impetrâsse, ut & ipse merearis, & quidem ex condigno? Diximus hanc in rem plura in diss. Theol. quâ paradoxum de servis omnia facientibus & tamen inutilibus diluitur, ad Luc. XVII. 10. p. 14. sqq. Ast, quid & opera supererogationis crepas, qui nôsti, Deum à nobis omne id poscere, quod ad sanctimoniam nostram altius evehendam facit? Quod si ita est, noli, quæso per omnem modum, crepare opera ad sanctitatem altius evehendam facientia, quæ Deus non injunxerit. Cultus à Deo non præceptus est ἐθελοθρησκεία, damnata à Paulo Col. II. 23. Confer & heic dissertationem citatam p. 23. 24. Ut taceam, & martyrium & prædicationem verbi divini injuncta esse, adeoque opera supererogationis esse nequire. Ultimum, quod observamus, hoc est. *Aureola* est diminutivum beati-

beatitudinis, quæ *aurea* est, cùm deberet esse augmentum majus. Itane ergò Virgines, Martyres, Doctores, præmio maximo, quod est ipsa beatitudo, macti ob excellentiorem pugnam, quam depugnare, pro excellentiore labore, quem exantlavere, accipiunt præmium ipsâ beatitudine minus, quo à reliquis beatis distinguantur? Vides, comprehendis, ita puto, sententiæ tuæ ineptiam, vides ideas se invicem jugulantes. Ast verò ais, nihil hanc in rem deciderit Concilium Tridentinum, pertinere itaque, quicquid statuerint heic Scholastici, ad campum problematum Theologorum. Ast asserit tamen Conc. Trid. sess. 6. can. 32. *hominem justificatum verè mereri gloriæ augmentum*. Sed *gloriæ augmentum* sensu tuo sunt *aureolæ*, quæ erogantur secundùm THOMAM Martyribus, virginibus & doctoribus juxta tres victorias privilegiatas. Ansam hoc dedit HEIDEGGERO in tumultu Concilii Tridentini T. I. contra AUGUSTINUM REDINGIUM, Abbatem Einsidelsensem de *aureolis* latiùs agendi. Credimus tamen, nos, quæcunque ferè hanc in rem dici possunt, in compendium redegisse.

Respondenti suo S. P. D. PRÆSES.

Rectè facis, mi KUTTERE, quòd specimine academico comprobatum das, quantâ assiduitate hætenus lectiones meas frequentaveris. Perge ita, gratiâ divinâ opitulante, augere eruditionem tuam theologicam. Assistat Spiritus sanctior studiis tuis, eaque sanctificet, ut in hominem Dei evadas, qui Ecclesiam patriam, cui consecratus es, olim plurimùm ædificet. Hic esto præcipuus & summus studiorum tuorum finis, quem ut assequare, votorum meorum summa est. Vale.

Aureolas circa debellas dogmata falsa,

Aureolis Victor sic redimitus abis.

Hisce pereximiis clarissimi Domini Respondentis, Cognati æstumatissimi, in Theologia profectibus sincere ad plaudis, iisque digna olim præmia ex animo adprecatur

M. Christ. Frid. Wild. in Ill. Stip. Theol. Repet.

Scilicet est aliquid, cum summa dicere laude
e cathedra, ac hostis frangere tela sui.

Porro tuis studiis Numen benedicat, ut olim
in Patriam ex omni parte beatus eas.

Hisce Clarissimo Domino Respondenti amico suo suavissimo amicitiam testari eximiosque studiorum profectus gratulari voluit

M. G. B. Canz, Opp.

Non dicam de laude TV A, quam jure mereris,
Nam specimen præsens nobile, testis erit.

Gratulor hoc, patriam poteris jam lætus adire,
Illa TVIS meritis præmia digna dabit.

Vota tamen restant, quæ sacrat amicus AMICO
Mente piâ, felix vive, mihique fave.

Hæc Venerabili atque Præclarissimo Domino Respondenti, Amico inter paucos conjunctissimo in sui memoriam apponere voluit

M. Georg Christoph Reinhardt, *Stuttgard.*

SS. Theol. Cand. in Ill. Stip. Theol. Opp.

Gratulor hoc specimen. TIBI, præclarissime Fautor,
Quo solidæ fistis dexteritatis opus.

TV merito à Musis deportas nomina Docti,

TE cingit merito Theiologia bonis,

Ob studium summum, sed pergito, dulcis Amice,

Summus JOVA TIBI & coelica ferta dabit.

Hæc Respondenti scribebat amicus amico,

Cujus Consiliis Numen adesse velit.

J. D. Schmid, Eßling. SS. Theol. Stud.

Der angebohrne Trieb, der Deinen Geist belebt,
Der nur nach Wissenschaft und seltenen Künsten strebt,
Ersteiget alles Lob, das Freunde Freunden geben.

Drum Vorsicht gönne Ihm lang und vergnügt zu leben!

Dem Herrn Respondenten, seinem schätzbaren Freunde, bezeuget
durch diesen aufrichtigen Wunsch seine Ergebenheit,
dessen billiger Verehrer,

J. G. Schelhorn, Memming. S. T. C. Opponens.

EPIGRAMME.

Tes rares Talens, KVITTER, te font assés connoître,
mais pour ton amitié, nous la ferons paroître,
tes merites par tout orneront nos discours,
nôtre zèle pour toi s'augmentera toujours,
sans jamais se lasser de chanter son savoir,
& de l'accompagner au Temple de memoire.

Monfieur, & cher ami

Agréez ce Sixain, que vos fidèles & très devoués compagnons
de Table, & Amis vous consacrent comme un monument
perpetuel de leur souvenir & de leur attachement,